

Abdul Razis terima Anugerah Tangan Emas Perdana Menteri

KUALA LUMPUR 16 Nov. - Penuntut Institut Latihan Perindustrian (ILP) Labuan, Abdul Razis Abdul Rajak, 20, muncul pemenang Anugerah Tangan Emas Perdana Menteri dalam satu majlis yang diadakan di Tapak Ekspo Pertanian Malaysia Serdang (MAEPS) dekat sini hari ini.

Abdul Razis yang turut menerima pingat emas bagi bidang paip dan pemanasan, membolehkannya membawa pulang sijil, piala dan wang tunai berjumlah RM15,000.

Anugerah itu merupakan hadiah tertinggi dalam pertandingan peringkat kebangsaan, *WorldSkills* Malaysia-Belia 2017, selain pingat emas, perak dan gangsa bagi 22 bidang yang dipertingkatkan.

Kira-kira 1,306 orang memohon menyertai pertandingan kemahiran tinggi itu, namun hanya 189 peserta ke peringkat akhir.

Abdul Razis melahirkan kegembiraan apabila namanya diumumkan sebagai pemenang pertandingan itu.

“Banyak cabaran dihadapi bagi melengkapkan projek dan tugas yang ditetapkan, namun dengan bantuan tenaga pelajar, rakan-rakan, saya berjaya melakukannya.

“Kemahiran yang ditimba dalam pertandingan itu lebih mendalam daripada diajarkan

dalam kursus pengajian yang saya pelajari,” ujarnya ketika ditemui.

Abdul Razis berkata, beliau kini membuat persediaan untuk ke *World Skill Competition* yang akan diadakan di Kazan, Rusia pada 2019.

Anugerah dan hadiah disampaikan oleh Menteri Sumber Manusia, Datuk Seri Dr. Richard Riot.

Yang turut hadir Menteri Kerja Raya, Datuk Seri Fadillah Yusof.



**ABDUL RAZIS
ABDUL RAJAK**